



CONVENIO DE COLABORACIÓN ENTRE A CONSELLERÍA DE EDUCACIÓN, UNIVERSIDADE E FORMACIÓN PROFESIONAL E A CONSELLERÍA DE ECONOMÍA EMPREGO E INDUSTRIA DA XUNTA DE GALICIA E A COMISIÓN DE INTERCAMBIO CULTURAL, EDUCATIVO E CIENTÍFICO ENTRE ESPAÑA E OS ESTADOS UNIDOS DE AMÉRICA PARA O PROGRAMA DE BOLSAS XUNTA DE GALICIA-FULBRIGHT

Santiago de Compostela, a 9 de setembro de 2019

COMPARECEN

Carmen Pomar Tojo, conselleira de Educación, Universidade e Formación Profesional (en diante, a Consellería), nomeada mediante o Decreto 96/2018, do 26 de setembro (DOG núm. 185 do 27 de setembro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e a súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Francisco Conde López, conselleiro de Economía, emprego e Industria e presidente da Axencia Galega de Innovación (en diante a Gain), nomeado mediante o Decreto 148/2016, do 13 de novembro (DOG núm. 217. do 14 de novembro), de acordo co disposto no artigo 34 da Lei 1/1983, do 22 de febreiro, de normas reguladoras da Xunta e a súa Presidencia e no acordo do Consello da Xunta de Galicia do 27 de marzo de 1991, sobre convenios de cooperación con outros entes públicos e de colaboración con particulares, publicado pola Resolución da Consellería de Economía e Facenda do 8 de abril de 1991 (DOG núm. 82, do 30 de abril).

Miguel Albero Suárez, Director de Relacións Culturais e Científicas da Axencia Española de Cooperación Internacional para o Desenvolvemento do Ministerio de Asuntos Exteriores e de Cooperación e Stewart D. Tuttle, Conselleiro da Diplomacia Pública da Embaixada dos Estados Unidos, como copresidentes da Comisión de Intercambio Cultural, Educativo e Científico entre España e os Estados Unidos de América (en diante, a Comisión Fulbright).

Interven en función dos seus respectivos cargos no exercicio das facultades que teñen conferidas e





EXPOÑEN

PRIMEIRO.- A Secretaría Xeral de Universidades é o órgano superior da Administración Xeral da Comunidade Autónoma para a ordenación, planificación e execución das competencias en materia de universidades e ensinanza universitaria correspondentes á Consellería de Educación, Universidade e Formación Profesional, atribuídas polo artigo 31 do Estatuto de Autonomía de Galicia. A Secretaría Xeral de Universidades, de acordo coas competencias que lle atribúe o Decreto 138/2018, do 8 de novembro, de estrutura orgánica da Consellería, debe velar pola promoción e xestión eficiente e integrada dos recursos e capacidades de investigación do Sistema universitario de Galicia (SUG) para a súa vertebración e posta en valor no marco do sistema de innovación. Esta xestión concéntrase na promoción, deseño e materialización dos instrumentos necesarios para mellorar o financiamento da súa actividade investigadora.

A Consellería considera prioritario fomentar a mobilidade, cooperación e internacionalización das persoas investigadoras, co obxectivo, entre outros, de incrementar a formación do persoal investigador de Galicia no estranxeiro e impulsar a internacionalización da investigación galega, co fin de mellorar a súa cantidade e calidade.

SEGUNDO.- A Gain é unha axencia pública autonómica encadrada nas entidades instrumentais do sector público autonómico reguladas no título III da Lei 16/2010, do 17 de decembro, de organización e funcionamento da Administración xeral do sector público autonómico, tal e como se recolle no Decreto 50/2012, do 12 de xaneiro, polo que se crea a Axencia Galega de Innovación e apróbanse os seus estatutos (modificado polo Decreto 15/2014, do 6 de febreiro).

A Gain está adscrita á Consellería de Economía, Emprego e Industria e conta con personalidade xurídica propia diferenciada respecto da Administración xeral da Comunidade Autónoma de Galicia, patrimonio e tesourería propios e autonomía de xestión nos termos que precisen as leis.

Os estatutos da Gain atribúenlle, entre outras funcións: a ordenación, planificación, coordinación, execución e seguimento das competencias en materia de fomento da investigación que ten atribuídas a Comunidade Autónoma de Galicia en virtude do establecido no artigo 27.19 do Estatuto de autonomía de Galicia.

TERCEIRO.- A Comisión Fulbright estableceuse en España en 1958 por acordo executivo entre os dous países. Desde entón coñécese como Comisión Fulbright polas





bolsas que administra. O acordo renovouse en 1994 ampliando os obxectivos da Comisión orixinal e subliñando a súa independencia.

A Comisión está formada por representantes dos dous países e copresidida por un alto cargo do Ministerio de Asuntos Exteriores e Cooperación e outro da Embaixada de Estados Unidos en España.

CUARTO.- As universidades que integran o SUG, os organismos públicos de investigación e as outras entidades do Sistema de I+D+i galego, xunto á súa misión docente, realizan actividades de investigación e desenvolvemento científico e tecnolóxico que as configura como un dos principais axentes xeradores de coñecemento en Galicia.

O impulso da actividade investigadora é un obxectivo irrenunciable para calquera sociedade e por iso é necesario fomentar unha maior integración entre os centros de investigación e os sectores produtivos, incidir na cultura de calidade e eficacia na utilización de infraestruturas e de capital humano que permitan unha mellora significativa na totalidade dos sectores produtivos e, á súa vez, a potenciación dunha universidade galega de calidade e demais entidades que conforman o I+D+i galego.

QUINTO.- A Estratexia de especialización intelixente de Galicia 2014-2020 (RIS3 Galicia), aprobada polo Consello da Xunta de Galicia, na súa reunión do 7 de novembro de 2013, define o marco para as políticas de investigación e innovación en Galicia para o período 2014-2020 e prevé, entre os seus instrumentos de desenvolvemento, o Programa emprendemento innovador como un instrumento específico para a retención, incorporación e mobilidade do talento.

Así mesmo, a atracción de talento a Galicia tamén supón unha mellora da calidade das actividades de investigación que se desenvolvan. É moi relevante que as universidades, as empresas e os centros de investigación de Galicia sexan polos de atracción para o persoal investigador posdoutoral de todo o mundo que fagan a investigación avanzada e competitiva.

SEXTO.- O programa Fulbright é o programa de intercambio educacional insignia do Goberno dos Estados Unidos e prové os seus participantes (escollidos polos seus méritos académicos e potencial de liderado) da oportunidade de estudar, ensinar e investigar e intercambiar ideas.

SÉTIMO.- A Comisión Fulbright, como entidade colaboradora, de acordo co establecido nos artigos 9 e seguintes da Lei 9/2007, do 13 de xuño, de subvencións de





Galicia, pon ao dispor da Consellería e da Gain a experiencia na xestión de programas de bolsas e axudas, e o persoal necesario para o desenvolvemento e seguimento destes.

SÉTIMO.- Que, ao amparo dos artigos I(A) e III (1 e 12) do Acordo do Reino de España e os Estados Unidos de América en materia de cooperación educativa, cultural e científica do 27 de outubro de 1994 (publicado no BOE núm. 119, do 19 de maio de 1995), e conscientes as partes asinantes da importancia da colaboración para contribuír ao impulso constante da excelencia científica, propóñense cooperar na promoción do persoal investigador vinculado aos programas de investigación da Consellería e da Gain.

De acordo co exposto anteriormente, as partes acordan subscribir o presente convenio, que se rexerá polas seguintes cláusulas

CLÁUSULAS

PRIMEIRA. Obxecto do convenio

Este convenio ten por obxecto establecer a colaboración entre a Consellería, a Gain e a Comisión Fulbright para a prestación de servizos complementarios destinados ás persoas beneficiarias das estadias Fulbright incluídas no programa de formación do persoal investigador en réxime de contrato posdoutoral da Xunta de Galicia. Están destinadas a persoas investigadoras das universidades galegas, dos organismos públicos de investigación de Galicia e doutras entidades do Sistema I+D+i galego, interesadas en completar a súa formación nunha universidade ou nun centro de investigación de Estados Unidos.

SEGUNDA.- Ámbito de aplicación

Este convenio será de aplicación ás actuacións derivadas das tres próximas convocatorias conxuntas da Consellería de Educación, Universidade e Formación Profesional e da Consellería de Economía, Emprego e Industria, a través da Gain, das axudas de apoio á etapa de formación posdoutoral, en réxime de concorrencia competitiva, nas universidades do SUG, nos organismos públicos de investigación de Galicia e noutras entidades do Sistema de I+D+i galego, que se convocan anualmente.

A Consellería e a Gain establecerán as bases das convocatorias de acordo coas normas aceptadas universalmente para o programa Fulbright, a normativa estadounidense en xeral e aquelas outras que sexan de aplicación á administración da Xunta de Galicia.





Estas bases serán publicadas no *Diario Oficial de Galicia*, dentro das convocatorias anuais mencionadas nos parágrafos anteriores.

TERCEIRA. Financiamento

A dotación da Consellería para este convenio procede do Plan galego de financiamento Universitario para o período 2016-2020, por un importe total de 360.000,00 € con cargo á aplicación orzamentaria 10.40.561B.781.0 (código de proxecto 2016 00129) dos orzamentos xerais da Xunta de Galicia para os exercicios 2019, 2020, 2021 e 2022. As anualidades de 2021 e 2022 integraranse no novo plan de financiamento para os anos seguintes.

A dotación da Gain para este convenio é de 72.000,00 €, con cargo á aplicación orzamentaria 09.A3.651A.781.0 (código de proxecto 2015/00016) dos orzamentos xerais da Xunta de Galicia para os exercicios 2019, 2020, 2021 e 2022.

A achega da Consellería de Educación, Universidade e Formación Profesional e da Gain, será de 6.000,00 euros por cada ano de contrato durante o período de estadía en Estados Unidos (zona 3).

A Comisión Fulbright recibirá polos servizos complementarios prestados como entidade colaboradora unha contía de 6.000,00 € para cada un dos contratos, ata un máximo para cada convocatoria de 10 persoas investigadoras para a Consellería de Educación, Universidade e Formación Profesional e de 2 para a Gain durante as anualidades de 2019, 2020, 2021 e 2022 consonte a seguinte táboa:

	2019	2020	2021	2022	Total
SXU	60.000,00	120.000,00	120.000,00	60.000,00	360.000,00
Gain	12.000,00	24.000,00	24.000,00	12.000,00	72.000,00
Total convenio	72.000,00	144.000,00	144.000,00	72.000,00	432.000,00

O importe total anual estará en función do número de persoas bolseiras Fulbright seleccionadas na convocatoria correspondente que realicen a estadía en Estados Unidos e que, en ningún caso, poderá ser superior a 10 para a Secretaría Xeral de Universidades nin a 2 para a Gain.

CUARTA.- Compromisos da Consellería de Educación, Universidade e Formación Profesional e da Gain

No marco do presente convenio, correspóndelle á Consellería de Educación, Universidade e Formación Profesional, a través da Secretaría Xeral de Universidades, e á Consellería de Economía, Emprego e Industria, a través da Gain:





1. Elaborar as correspondentes convocatorias, tendo en conta a conformidade da Comisión Fulbright.
2. Concretar os procedementos establecidos nas convocatorias, tendo en conta a características e necesidades da convocatoria, designando os órganos, comisións ou expertos que estime necesarios para realizar as actuacións de seguimento e comprobación da aplicación das axudas, así como solicitar a información complementaria que se considere en cada caso sobre o cumprimento dos obxectivos das axudas. Incluirase, así mesmo, un representante da Comisión Fulbright na comisión de selección das axudas da correspondente convocatoria.
3. Abonar á Comisión Fulbright os importes que corresponden como compensación económica pola colaboración prestada na súa condición de entidade colaborada coa Consellería de Educación, Universidade e Formación Profesional e coa Gain.
4. Comunicar á Comisión Fulbright a resolución de concesión das axudas, así como a información relativa ás devanditas concesións.
5. Comunicar á Comisión Fulbright a autorización ou denegación de calquera modificación das condicións da axuda, e calquera outra incidencia.

QUINTA.- Compromisos da Comisión Fulbright

Á Comisión Fulbright, que actúa en nome e por conta da Consellería de Educación, Universidade e Formación Profesional e da Gain como órgano concedente de bolsas e subvencións, correspóndelle:

1. Asumir a condición de entidade colaboradora nos termos establecidos no artigo 9 e seguintes da Lei 9/2007, do 13 de xuño, de subvencións de Galicia, para todas as persoas beneficiarias ás que lles sexan concedidas bolsas incluídas no ámbito de aplicación do presente convenio.
2. Así mesmo, e polas características concretas do Programa, a Comisión comprométese a prestar os seguintes servizos: xestión de visados; apoio, xestión e asesoría durante a estada en Estados Unidos; participación das persoas beneficiarias en seminarios, actividades científicas e culturais que se organicen en nome e polo Programa Fulbright; seguro médico con cobertura de enfermidade e accidentes; e, formar parte da rede de antigos alumnos e alumnas Fulbright do U.S. Department of State.
3. As subvencións concedidas pola Xunta de Galicia obxecto do presente Convenio deberán ser destinadas unicamente ao fin outorgado.
4. Incluír nos documentos que se formalicen en aplicación do punto anterior, a referencia ao financiamento dos mesmos por parte da Consellería de Educación, Universidade e Formación Profesional e da Gain. Igualmente velará para que nas publicacións e outros resultados aos que poidan dar os traballos de investigacións realizadas ao amparo dos programas acollidos ao presente convenio, fágase referencia ao devandita financiamento.





5. Solicitar ás persoas beneficiarias a xustificación requirida na convocatoria tanto para acreditar a súa incorporación como durante a estadia e ao finalizar esta, así como calquera documento necesario para poder levar a cabo o seguimento científico-técnico, facilitando a oportuna documentación e información aos centros directivos responsables dos programas, de conformidade co establecido nas respectivas convocatorias.
6. Cumprir os requisitos recollidos na Lei 9/2007, do 13 de xuño, de subvencións de Galicia, así como facilitar a información requirida pola Intervención Xeral da Comunidade Autónoma e polo Consello de Contas.

SEXTA.- Xustificación

Para os correspondentes pagamentos, de acordo co estipulado na cláusula terceira, a Comisión Fulbright remitirá á Secretaría Xeral de Universidades ou á Gain, segundo corresponda, antes do 20 de novembro de cada ano de vixencia do convenio, a seguinte documentación:

- a) Certificación na que se acredite a vinculación da persoa investigadora co centro de investigación ou á universidade de Estados Unidos na que se desenvolve a súa formación.
- b) Certificación emitida polo órgano que teña atribuídas as facultades de control económico, que acredite o cumprimento da finalidade do presente convenio e que os fondos foron destinados a este fin, así como o detalle de realización de gastos que son obxecto de financiamento do convenio.
- c) Unha memoria explicativa das actividades levadas a cabo con cargo aos fondos recibidos, debidamente asinada pola persoa responsable que teña atribuída esta función.

SÉTIMA.- Responsabilidade

A subscrición deste convenio non supón relación laboral contractual ou de calquera outro tipo entre os e as profesionais que desenvolvan actividades e a Consellería e a Gain, de tal forma que non se poderá exixir ningunha responsabilidade, indirecta nin subsidiaria, polos actos ou feitos acaecidos no seu desenvolvemento.

OITAVA.- Comisión de seguimento

Para o seguimento do convenio ou de calquera outra cuestión sobre a súa interpretación, modificación, resolución ou efectos, créase unha comisión de seguimento integrada por:

- Unha persoa da Secretaría Xeral de Universidades, que asumirá a Presidencia.
- Unha persoa da Gain.





- Dúas persoas designadas pola Comisión Fulbright.

Esta comisión actuará como órgano de vixilancia, seguimento e control do establecido neste convenio, promovendo, se o considera oportuno, outras actuacións que poidan enriquecer o seu desenvolvemento.

Con todo, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación de posibles responsabilidades relativas á subvención concedida serán resoltas pola Consellería e pola Gain.

NOVENA.- Vixencia do convenio

Este convenio entrará en vigor o día da súa sinatura, e terá vixencia ata o 30 de decembro de 2022.

Poderá extinguirse por acordo mutuo e voluntario das partes, por renuncia dalgunha delas ou por denuncia por incumprimento, o que se comunicará fidedignamente, previa audiencia e cun mínimo dun mes de antelación. En calquera destes casos, procederase á revogación da axuda, así como ao reintegro total ou parcial das cantidades percibidas e á exixencia dos xuros de mora nos casos previstos no artigo 33 da Lei 9/2007, do 13 de xuño, de subvencións de Galicia.

DÉCIMA.- Natureza do convenio.

Este convenio ten carácter administrativo e os seus efectos rexeranse polo establecido nas súas cláusulas. Quedará suxeito ao disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, feito público por Resolución da Consellería de Economía e Facenda, do 8 de abril de 1991.

De acordo co establecido no artigo 36 do Decreto 11/2009, do 8 de xaneiro, polo que se aproba o regulamento da Lei 9/2007, do 13 de xuño, de subvencións de Galicia, este convenio ten un interese público, xa que lle corresponde á Xunta de Galicia, a través da Consellería e da Gain, coordinar as universidades do SUG e as demais entidades que conforman o Sistema galego de I+D+i para conseguir mellorar a investigación, a promoción, a adaptación ás demandas e necesidades da sociedade e a realización de estudos no ámbito da docencia, investigación, innovación, xestión.

Segundo o establecido na comunicación da Comisión Europea sobre o Marco de axudas estatais de investigación e desenvolvemento e innovación (2014/C 198/01), publicado no Diario Oficial da Unión Europea do 27 de xuño de 2014, a subvención contemplada neste convenio non constitúe axuda de Estado nos termos do artigo 107 do Tratado de funcionamento da Unión Europea por tratarse de axudas dirixidas á realización de





actividades de I+D+i de carácter non económico, por parte de universidades públicas e de organismos de investigación sen ánimo de lucro, e darse difusión dos resultados da actividade do organismo de investigación subvencionado e a disposición de todos dunha maneira indiscriminada, de xeito que non se produce vantaxe económica para a entidade subvencionada.

DÉCIMO-PRIMEIRA.- Publicidade

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, a Comisión Fulbright consente expresamente para que a Administración inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como as sancións impostas. A reserva que puidesen facer no sentido de non autorizar a obtención de datos ou a publicidade nos devanditos rexistros, que en todo caso terán que se expresar, poderá dar lugar á exclusión do proceso de participación para obter a axuda ou á revogación do acto de outorgamento.

As subvencións estarán sometidas á función interventora e control financeiro exercida pola Intervención Xeral da Comunidade Autónoma, nos termos que establece a Lei 9/2007, do 13 de xuño, de subvencións de Galicia. Así mesmo, estarán sometidas ás actuacións de comprobación previstas na lexislación do Tribunal de Contas e do Consello de Contas no exercicio das súas funcións de fiscalización e control do destino das subvencións.

A aplicación dos principios recollidos na Lei 19/2013, do 9 de decembro, de transparencia, acceso á información pública e bo goberno, de acordo co indicado na actual redacción do artigo 20 da Lei 38/2003, do 17 de novembro, xeneral de subvencións e segundo o disposto nos artigos 3,1,b) e 15 da Lei 1/2016, do 18 de xaneiro, de transparencia e bo goberno, a información correspondente ao presente convenio publicarase na Base de datos Nacional de Subvencións.

DÉCIMO-SEGUNDA.- Resolución de controversias

O presente convenio réxese en canto á súa interpretación e desenvolvemento polo ordenamento xurídico administrativo, con expresa submisión das partes á xurisdición contencioso-administrativa, nos termos que se establecen nos artigos 47 e seguintes da Lei 40/20015, do 1 de outubro, de réxime xurídico do sector público.

Lido polas partes, por si mesmas, e como proba de conformidade co expresado no presente convenio, asinan e rubrican, no mesmo lugar e data que se indican ao comezo.





Carmen Pomar Tojo

Conselleira de Educación, Universidade e Formación Profesional. Xunta de Galicia

Francisco Conde López

Conselleiro de Economía, emprego e Industria e presidente da Axencia Galega de Innovación. Xunta de Galicia

Miguel Alberto Suárez

Director de Relacións Culturais e Científicas da Axencia Española de Cooperación Internacional para o Desenvolvemento do Ministerio de Asuntos Exteriores e de Cooperación e Copresidente da Comisión de Intercambio Cultural, Educativo e Científico entre España e Estados Unidos, Comisión Fulbright

Stewart D. Tuttle

Conselleiro para a Diplomacia Pública da Embaixada de Estados Unidos en España e Copresidente da Comisión de Intercambio Cultural, Educativo e Científico entre España e Estados Unidos, Comisión Fulbright

